

# WEURDJJE VANNE VORST



Dao zeen nog zekerhede in het lèeve. Ein van diej zekerhede: **het weurdj eeder jaor weer vastelaovendj, het weurdj altièd weer**

**karnaval!** Eine tièd van verbroedering, van het veere van het lèeve! Zake diej wèe hiej in ôs prachtig Kinder en bieje oëtbreijing in ôs fantastisse fusiejgemeindj good kinne. Es ter eine priës zouw wèere oëtgereiktj: bèste fiëstgemeindj van Belsj, den zouwe wèe eine dikke kanschöbber zeen!

De karnavalsdaag zeen de daag bieje oëtstek om same te kòme, en om rang of standj bjuch te laote hange aane kapstok. Inne plaats pukse de verkleidkleijer, de fiëstnaas of het mombakkes oët de kast en duise ins good gek. Neemes dèe dich dao-op aankièktj mèt vastelaovendj. Eederein gelièk. Heerlik, toch?!

Ich weit het nog es d'n daag van gister, det ich mèt **Bart Christis** en miën broor **Peter** mèt deej aane stoet. Piskes wore wèe, mèt ein zelf gemaakdje ker en es tuinmèn verklèdj. De jaore dao-nao woor ôos wèegelke eederskiër get groëter en môste wèe neet miër zelf de klømmel trèkke. Het groepke kammeraöj deindje ouch eeder jaor get oët. Tot het op eine kiër stopdje. Groëter wèere, anger sjoële en anger minse tege kòme op het paad. Zoë geit det in het lèeve. Later trok ich mèt **Geert Vandewal** es Snelle Eddies mèt eine sjikke Opel Manta door de Kinderse straote, om weer ei jaor wiejer es Bassie en Adriaan mèt te rieje. Kômplièt mèt de Baron, Vlögge Japie, B1 en B2 ter bieje. Om euver dèe volledig opgemaakdje karavan en

Honda Prelude nog mer te zwiège. Gekoch allein veur diej lampe waat omhoëg en omlièg koste. Volledig verenneweerdj mèt eine vèrfbeustel en stikkers, mer wiej gek het ouch maag klinke: gei verlees op gemaaktj toen 'r weer waas verkoch. **Geert, Patrick, Danny, Raf, Johan, Bjorn, Jos:** waat hóbbe wèe ôs toen geamezeerdj...

Het waas op d'n èllefde van d'n èllefde 2008 det ich saoves aan het buffet zaat, toen **Prins Bennie 1** en aod-veurzitter **Ivo Theijs** langs mich kwame zitte. "De Raod van Èllef, zouw det niks veur dich zeen?" vroege ze. En de rest is ongertösse gesjiedenis. Ich waas nog mer good ei jaor bieje Rabbedabbers toen ich hawf janewariej 2010 es Vorst miëne vrièd gewaardeerdje veurganger **Jos Moubax** op moch volge. En ongertösse zeen wèe weer bekans 10 jaor wiejer, merke wèe det d'n tièd ech waal vluëgtj en bèn ich strak – in het seizoen '20 -'21 – èllef jaor in dees funksiej aktief. En ich hób mich det nog praktis neet beklaagdj. ☺ Sterker nog: de vastelaovendj zitj nog miër in het blood den oëjts teveure. Wèe zeen dus waal waat de toekômstj ôs bringtj!

**Fijn karnavalsdaag gewinstj, in gooj gezondjheid en in gooj kômpeniej! Sjrief uch de daag op 't achterste blaad mer mèt ein dikke stift in ugge agenda!!!**

Jeugd-raod Alaaf!  
Rabbedabbers Alaaf!  
Kinder Alaaf!



42<sup>ste</sup> jaorgank

# RABBEDABBERS

2019



## MÈT IN DEES EDISIE ONGER ANGERE

- Alweer ei geheim resept van Pool Frit!
- D'n allerlèste kiër Malpertuus!
- Bòndj bèejdj veur uch!
- Operasiej 'zuëver henj' in Kinder!
- Gèel hesjes kòme op veur ónaafhankelijkheid Kinder!
- G-Tiëm Maaslandj NO bezörgtj Anderlecht trouma!
- Roel Bosmans kiktj aaf!
- Ramkraake in Kinder zindere nog nao!
- Landelikke Gilde 'lichtj' Kinder op!
- Wirkdrök Kinderse zelfstandige vreektj zich!
- Bekkeriej Martens geit mèt de tièd mèt!
- Kinderse dörpsdichters kinne neet miër door dezelfde deur!
- Ielegaal krosparkeer waas mer kort lèeve besjore!
- Ièwige sjanj: Jo Brouns heet eine eige klikfarm!
- Ônbelastj biejverdeene good vanne gròndj in Kinder!
- ... en nog veul miër sjèele zeiver!

Vorst Mark



# PROKLAMASIEJ PRINS BART III

Gedaon te Kinder inne sporthal oppe 42e  
prinsezitting van 12 janewariej 2019 door ugge 42e  
groëte prins van de Rabbedabbers van Kinder,  
Graaf vanne Wiërtersteinwëeg, Hertog van het  
Dörp, Baron van zölder tot keldergaag,

Mèt  
de  
grasiej  
vanne  
Veurzitter  
en miëne

veurgaondje Prins,  
mèt de zèege vanne aod-  
prinse verklaor ich hiejbiej  
vandaag miën èllef punte.

Ugge euvergelökkige  
**Prins Bart d'n 3<sup>e</sup>**

Miën leuze veur dit jaor  
zal dèn auch zeen:

*Ei leeg glaas det  
stuit neet, dus tap  
ze mer voll!*

*Den roop ich  
Kinder Alaaf!  
Prosit,  
gezôndjheid  
en sjoll!*

**TEN IËSTE:** Ich, Bart Kunnen, bèn  
vandaag zoë fier es eine geeter. Want ich  
maag uch vertèlle dèt ich dit jaor door het  
lèeve kan gaon es de 42e groëte prins vanne  
Rabbedabbers van Kinder es : Prins Bart d'n 3e !

**TEN TWIËDJE:** Allein is mer allein, en  
det is bij mich gelökkig neet het geval. Aan  
mien ziej stuit dit jaor: Prinses Gaëlle de 1e !

**TEN DÖRDJE:** Es ich ottoos kin tjoene, veul ich mich  
in miëne sas en kôm ich tot lèeve. Kwa meteur blijftj det aoje  
kraom, mer mèt get vèrf kin ich hum waal ein anger oëtzicht gèeve!

**TEN VEERDJE:** Bij Cuub bèn ich eine sjef betông, veural waat kelders  
betreftj wirk ich snel en waterdichtj. Dus höbtj gèe ei gaat inne grôndj  
en wiltj gèe bôwwë gaon: ich zörg det ugge rômmel veurtaan druëg liktj!

**TEN VIËFDJE:** Ich bèn hevig supporter van KD Motorsports en  
Team Buurman van Zuidam bjôs inne straot. Es ich de benzin ruëk en  
de ottoos door de bochte zeen gaon, stuit ouch op mich gein maot!

**TEN ZËSDJE:** In miën Prinsejaor zal ich in september al 10 jaor  
getrouwdj zeen mèt miën Prinses. Verwach uch dus ouch boëte het  
sezoen mer aan ei fiëstje, den klinke wèe mèt miër es ein fles!

**TEN ZEEVENDJE:** De stoet trèktj dit jaor op 3 miërt door de Kinderse straote,  
de kans op good wèer is den hiël groët en dus ouch op good gezindje luj. Mèt get  
sjaos sjientj de zôn vollebak, is het lekker werm en staon de bleumkes al in bluj!

**TEN ACHSTE:** Miëne bijnaam bjôs is 'Poepie', dèe heet miën Prinses mich gegèeve, is det neet fijn?  
Mer gèe moogtj mich dit jaor aansprèeke mèt Prins, angers weurdj het te verwarrendj veur eederein.

**TEN NEEGENDJE:** Ôs kinjer Aurélie en Kevin gaon dit jaor mèt fiëste mèt ôs, diej zeen echt gruëts nôw hun aojers  
groët Prinsepaar zeen gewore. Wèe zitte trök mèt 4 jeugdige bjôs, want es Prins en Prinses veule wèe ôs es herbore!

**TEN TIËNDJE:** Veur ei pintje te drinke mèt kammeraøj maak ich gèer get tiëd vriej.

Waat kinse dich es Prins miër winse: plezeer make mèt vrunj ter bijj!

**TEN ÈLLEFDJE:** Ei Prinsejaor mèt make, det gebeurtj normaal mer eine kiër in ei lèeve!

Ich gaon mich den ouch de kômendje 52 wèeke vollebak gèeve!

# PROKLAMASIEJ

## JEUGDPRINS

## MATHIS I EN

## JEUGDPRINSES

## ILANI I



### TEN IËSTE:

Ich bèn  
Mathis

Leen, zoon

van Serge Leen en  
Kristel Cleeren. Mer

vanaaf vandaag maag  
eederein mich aanspreeke  
es Jeugdprins Mathis den 1e!

**TEN TWIËDJE:** En ich bèn  
Ilani Peeters, dochter van Davy  
Peeters en Katrien Theijbers. En

vanaaf noë tot volgendj jaor rëndj deze  
tiëd, heit ich Jeugdprinses Ilani de 1e!

**TEN DÖRDJE:** Oppe voetbal lëef ich  
mich oët en gëef ich tege eedere veurzèt eine  
knal! Mer in het vastelaovendswiekendj môtte ze  
mich effe vervange, den is het tiëd veur carnaval!

**TEN VEERDJE:** Es ich neet oppe sjoël bèn, wil ich waal ins  
ei metsjke volliebal speule of riej ich pèerd! Mer ouch ich gaon  
mèt de karnavalsdaag wegbliëve van het plein of oët de èerd!

**TEN VIËFDJE:** Doot mich mer eine gooje pannekook, en  
zeker gein sproëte, det vinj ich neet te èete! Eine kiër gegèete  
vanzelleve, en dëe vieze smaak bèn ich nog neet vergèete!

**TEN ZËSDJE:** Eine hotdog vinj ich den weer lekker, det is iedejaal!  
Of det mèt frikedel of knakwoost is, det blëftj mich egaal!

**TEN ZEEVENDJE:** Es ich karnavalsmeziëk huër begin ich spontaan te bewèege,  
te sjoenkele en te fiëste! Het zal ter bônk op zeen, mèt Jeugdprins Mathis den 1ste!

**TEN ACHSTE:** Familie, vrunj, de biëste bjôs: ich haoj van ze allemaol  
ève veul en ze sloëte mer allemaol aan! Es ziej allemaol mèt mich mèt  
gaon doen, geit het rekordj van langste polonèeze in Kinder ter aan!

**TEN NEEGENDJE:** Es ich groët bèn wil ich ouch aan ottoos klômmele in  
papa ziën graasj! In 't begin veur get zakgeldj, en later es miëne eige baas!

**TEN TIËNDJE:** Later gaon ich juffrouw wèere, en alle kinjer in miën klas ei pak slummer make! Ze  
môtte den waal ouch hun lësse euver de carnaval good liëre, wille ze op het volgendj studiejaor gerake!

**TEN ÈLLEFDJE:** Ôos leuze veur dit jaor zal zeen:



*Mèt Mathis en Ilani es Jeugdprinsepaar is het hiej nog neet klaor!  
2019 weurdj ein superdeluks karnavalsjaor!*

# *Prins Bart III & De Rabbedabbers bedanke dees hanjelèers veur hunne steun*

- Frituur 't Simpelke
- Aardbeienkwekerij Royakkers A.
- Lemmens Marc BVBA
- ADS+ BVBA
- Radio Monza
- JEKO
- 't Rond Punt
- Algemene Kitwerken Jacky Neyens
- Press & Paper Clips
- Tattoo Jos Breukers
- Vanwijck Tony Sanitair en CV
- Sportcafé De Schans
- Zuidam Classics  
De Bakmiep
- LS Car Service
- Tholen Ine Verpleegteam Bree
- Aardbeiden Gebr. Royakkers
- Bistro Chéz Vie
- BNP Parisbas Kinrooi
- M&M
- Afwerkingsbedrijf Carpentier
- Grond- en Waterwerken Heymans
- Schrijnwerkerij Smeets M.
- Afwerkingsbedrijf Baens
- Ellen's Hairdesign
- Coolen Theo Transport
- Kinesiste Stefanie Joosten
- Schrijnwerkerij Steensels Patrick
- Thuisverpleging Cura
- Vroedvrouwenpraktijk Initia
- Saint Mac
- Schoonheidssalon Maryeskai
- Bouwwerken V&R
- Garage Brouns
- Maco Elektro
- Petroleumproducten Segers
- Lunchbox
- Bandenshop Kinrooi
- Begrafenisonderneming Vancleef
- VDS Elektronics
- Traiteur Peter Cremers
- Belfius Kinrooi
- Domen Drinks
- KBC Kinrooi
- Amesco
- Amerikaanse Stock Geelen
- BP Interieur Design
- Café De Grenshook
- Verzekeringen Teuwen Stefan
- Linssen Stan Verzekeringen
- Frituur 't Hapje
- Sec. Poorten Peter Kuypers
- Tuinaanleg en -onderhoud Chris Hendriks
- Aveve Verbeek
- Fietsen Henkens Eric
- Marc Segers
- RS Photography
- Haarstudio Suzy
- Bloemencreatie Monique
- Willen Security
- Segers Snacks
- Algemene Schrijnwerkerij Jacky Houben
- Dierenartspraktijk de Morée - De Clippeleir
- Optiek Raquel Staeren
- Chocolade Atelier
- Stukadoor L. Houben
- Apotheek Peeters
- ABC wooninrichting
- Kapsalon Madeleine
- Kinesist Loyen J.
- Openhaardenbouw
- Fietsshop Vandewal
- Garage Vandervecken  
- Sterkendries
- Marisa Di Girolamo
- 't Stampertje
- Bosmans & Co - KARO
- Herenkapper Piet Verstraeten
- Kapsalon Brigitte
- Garage Winters
- Tentenverhuur Jan-Arie De Jong
- Dierenartspraktijk Bruckers
- Keukens Vanthoor Eddy
- Nachtwinkel 't Dorp
- Zakenkantoor R. Theijbers
- Verzekeringen Schaekers
- Tandarts Johan Lemmens
- Kapsalon Marie-Therese
- Kinesiste Ilse Jacobs
- Notaris Debucquoy
- Naaimachines Janssen H.
- Dr. Bullen
- Frituur GiGi
- Melkveebedrijf Hoeken LV
- Rijschool Het Maasland NV
- Tandarts Vanende M.
- Verheyden Electriciteitswerken
- Café De Limburger

*Het is mèt door ugge steun  
det de Kinderse karnaval  
kintj bliëve bestaon!*



# GÈEL HESJES KÔME OP VEUR ÔNAAFHANKELIKHEID KINDER!

Zjust toen eederein dach: “Diej raasj van diej gèel hesjes is zoë good es veurbiej!” kwaam ter opins in Kinder ouch ein bewèging op gang. Ei deil Kinderse wuillesse trokke in stoet van op het dôrp nao het gemeindjehoës ôm te protestere tege meugelikke fusieplanne van Kinder mèt Mezeik of Bree. Het ging ter hevig aan tôw. Wèe vanne Rabbedabber steurdje eine reporter ter plaatse veur ein intervjoew mèt ei paar betrokkene.

**Kris Peeters** waas d’n iëste dèe wèe veur de mikro kreges, mer jaomer genôg kwaam dao niks fatsoenliks oët. Zoë zaat es ei verke waas meniër. Ein sjanj det betoge veur sômmige manskèerels altiëd geliëk môt staon aan zoëpe. Ouch **Tiffany Bruckers**, det getrouwdj is mèt Kris, wis neet boë te kiëke van sjaamtje. Gelökkig wou ze waal ei weurdje oëtlèg gèeve bije de gebeurtenisse.

**Tiffany:** “Wèe kôme hiej op het graas veur het gemeindjehoës same ôm te betoge tege ein meugelikke fusie mèt Mezeik of Bree. Wèe wille

det neet! Ich gaon het iërlik zègge: ich môt niks van Mezeik en Bree weite. Ich wil ônaafhankelik blieve en neet mèt diej dikköp in eine kôrf gesmete wèere.”

Klaore taal van Tiffany, die nao ôs te woord te hōbbe gestaon mèt eier begos te goeje tege de rame van de nôwwe technisse deenst. De volgendje diej wèe veur de mikro kreges waas **juffrouw Marina** vanne kleutersjoël.

**Marina:** “Ich weit det al dees minse hiej protestere tege ein fusie mèt anger stede rōndj ôm ôs. Mich muktj det eigelik neet zoë veul oët, mer ich doon mèt oët simpatie. Ich staon al zoë lank in het ôngerwiës det ich van good de hëlftj van dees luj de kinjer inne klas hōb g’hadj. 10 persent heet zelfs in eige persoën bije mich inne klas gezèete. Behalve Jean hiej achter mich, dèe is same mèt mich de aojerdômsdeeke vandaag.”

Inderdaad, ouch **Jean Fiddelèers** waas aanwezig. Ouch aan hum vrogge wèe ei weurdje oëtlèg.

**Jean:** “Ôm iërlik te zeen dach ich det dit ein klimaatmars waas. Ich waas aan ’t wanjele mèt ei gèel hesje aan en toen ich eederein zaag vertrèkke nao hiej, bèn ich mer gewuën mèt aan gegange. Pas toen wèe hiej op het gelèeg stōnge kwaam ich ter achter det het euver ein mars veur de ônaafhankelikheid ging en neet veur ei protest tege de opwōrming vanne wèereldj. Och jeh, mich is det egaal. Eine kiër ferm vanne diene tak make is altiëd sjoën. Tege 5 oor trèkke wèe mèt get luj al diej struëk hiej oët en make wèe ei groët kampveur tege de kaaj, want ich dink det wèe hiej nog waal efkes gaon staon.”

Bije de betogers stōng ouch **Christof Voortmans**, dèe zich bliëkbaar haaj vergistj van outfit. Get gèels mèt ein hesje in plaats van ei gèel hesje... Christof veuldje ôs vrag al aankōme en heel het bije eine korte: “Geine kōmmentaar! De volgendje kiër staon wèe hiej mèt dōbbel zoëveul volk en zōrg ich waal veur de zjuste kleijer!”

Rōndj ein oor of 10 saoves ging eederein te voot trōk op het dôrp aan en sangerdaags kōs de technisse deenst de kraom op beginne ruëme en de gemaakdje sjaai te beginne herstellè. Kinder deej ziëne naam weer alle iër aan: sōms opwindendj, en den weer rōstig...





# BÔNDJ BÈEJDJ VEUR UCH!

**Dominiek 'Good Zaod môt Plekke' vanne Bôndj** zaat ei paar maondj geleeje in zwoar wêer. Alle ônkroëdverdelgers mèt gliefosaat môtte oët d'n hanjel weg. Det zouw vriëd ôngezôndj zeen. Nateurlik stông Bôndj drek op ziën achterste puëj, kreeg **Brigitte** kaoj rillinge en zaat de sjrik veur ei fajiesement ter al good in. Pas nog ei hûnderdjaorig bestaon geveerdj waat al aardig get duite haaj gekostj, en den ei verbod op de meist verkochte produkte door de stroot op gedôwdj kriege... Neet veur mèt te lache! Det is geliëk ei kaffee zônger beer, of ein frituur zônger fritte.

Gelökkig is Bôndj nogal snel gekalmeerdj en is hêe mèt Brigitte en get kammeraöj good gaon naodinke. Ei gans nôw konsept is dao-oët ôntstange, en wêe vanne Rabbedabber dinke det het geit aanslaon. Wêe zeen gruëts det wêe es mediapartner van Bôndj het noëts es iëste moge bringe. Wêe laote

Dominiek efkes zelf aan het woord.

**Dominiek:** "Ich gaon de zaak volledig riestaajle! Es de moderne metodes neet miër moge vanne polletiek, den kinne wêe mer eine wêeg miër op: trök inne tiëd. Vreuger haaje ze ouch geine Bofiks, Roundup en god-wëtj waat veur smeerlapperiej nog allemaal. Vreuger haaje de minse dèk allein mer hun geluif. En toen huërdje se toch ouch neemes klage euver ônkroëd ônger de struëk of klaver inne gazon? Dus ich hōb mich ins röstig niër gezat in de zèetel en bèn same mèt Brigitte beginne prakkezere. Es wêe wiejer môtte lèeve vanne verkoup van hoondervoor, rèekskes, kroekerre en zaod, gaon wêe ter binne de korste kiëre aan ôngerdoor. Brigitte en ich keeke ôs al aan mèt de traone inne ouge en inins zaage wêe het leecht! Es of God de Vader zelf ei teike gaaf. Sins toen ging het rap. Wêe hōbbe mèt de opbringst van ôzze lèste Roundup en Bofiks geïnvesteerdj in ein nôw konsept: 'Bôndj Bèejdj veur Uch'. Of 't is te zègge: veur uggen hoof. (lacht) Ich hōb al mèt d'n hoofdzèetel gebeldj en ein

naamsverandering van AVEVE nao AVE MARIA is gein enkel probleem."

"Es gèe dus volgendj veurjaor weer het ônkroëd zeetj oëtkôme, kintj gèe mich belle. Ich kôm den, eventuweel same mèt uch, op ugge gazon of in uggen hoof bèeje. Het ônkroëd weg bèeje zèk mer. Es det vreuger met vratte of veur beginnendje haoroëtval wirkdje, den môtte diej technieke nôw ouch nog bruëkbaar zeen. En ei plaatsbezoek kostj uch mer 24,95 euro. Gei geldj! Inne zaak is het ouch meugelik ôm mèt Brigitte en **Hilde** eedere naomiddig eine roëzekrans te bèeje. Det kintj allein of in groep. Dus es gèe eine naober hōbtj mèt veul pisbloome of





# RINA EN RIËK

## ZWEIJE AAF!



anger voeligheid: sprèk same get aaf. Het tarief veur deze saörvis is 15,95 euro. Kumse in groep (vanaaf 5 man), den betaalse mer 9,95 de kop.”

“Ich bèn ouch nog bezig mèt te bekiëke of ich eedere maondj gein mès kan laote doorgaon inne kirk. Mer det hingt nog. Pestoër duit nog get meujlik òmdet ich eine ketter zouw zeen. Ich snap det waal, diej môtte nog get winne aan diej nôwwe invöllinge vanne kirke. Al vinj ich waal det ich ein kans verdeen. Bèje is bèje, of neet?! Angers môt ich Rick De Leeuw ins laote aafkòme òm ter mèt pestoër ins euver te kalle...”

“Es gèe echt zwaor last höbtj van biësteriej op uch gelèeg, ich dink mer aan dèe voële broëne klaver, den is ter miër vandoon. Den kintj gèe mirakelwater koupe. Ich verkoup det ònger d'n toog door, want het is neet drek wiej desse kins zègge veur de volle 100% legaal. Mer kòm, inne Katolieke Kirk kniëpe ze alzelève ouch get uigskes tów.”

Zoë-es altiëd dinke wèe det Bòndj weer eine gooje zèt heet gedaon mèt dees lèste òmmezweij. Mèt gaon mèt de tiëd, det mósse kinne. Wèe dinke det Bòndj det kintj, en winse hum weeral veul sukses!

In 42 jaor kaffee hóbse hiël get veurbiej zeen kòme. Hiël get mèt gemaaktj, traone gelache en traone gejanktj van verdreet. In juni 2018 zweijdje Rina en Riëk aaf, mèt ein tòn en ei geweldig fiëst. De lèste kiër Kaffee Sport zoë-es 'r 42 jaor heet bestaon. Biej gebrek aan eine zjoernalist van òzze Rabbedabber dèe vriej waas dèen aovendj, hóbbe wèe **Pieter Vanhoef** gesteurdj. Dèe kwaam naoderhandj mèt ein eigezinnige

reportaasj aaf, boë-òet bleek det ouch de lèste aovendj eine knaller van formaot waas. Neet alles ging euveriges volges plan...



## VÈTTIGE MÔPPE



“Waat wilse later wèere?” vreugjt **Judith Zuidam** oppe

Chiro aan **Stef Stals**.

“Stinkendj riëk,” zeet Stef. “Den koup ich eine Porsj, eine Rolex en ein villa mèt zwumbad. Den zeuk ich mich ein knappe griet det ich ein appartement aan zië kado doon en deur juwele gèef. En den bedriëf ich eedere daag de leefdje mèt heur, wiej eine losgeslage jônge hôndj!” Judith stuit mèt de môndj vol tenj. “En dich, **Jutta?**” vreugjt ze. “Waat wils dich later wèere?”

“Waat dinkse zelf,” zeet Jutta. “Det vrouwmins van Stef.”

**Maurice Maessen** is aan het vertèlle tege **Ron Tonnaer**: “Eine kammeraod van mich duit het mèt eine twiëling! En ze haoje allebei van anaal en op z'n hundjes!”

Ron prakkezeertj hël-op: “Dèe is good bezig, mer wiej hiltj 'r diej oët ein es hèe achter ze stuit?”

Maurice: “Simpel: Marloes heet dikke tette en ein gesjore poes. En Dirk heet ein snôr en veul haor oppe vot.”



## DAVE BULLEN VRIEJWILLIGER VAN HET JAOR!



Aafgeloupe maondj is door de Kulturele Raod vanne gemeindj de trofee ‘Vriewilliger van het Jaor’ oëtgereiktj in eine aafgelaaje volle Bunker. **Dave Bullen** kwaam es groëte winnaar oët de bös. Hèe zètz sich 2 kiër per wèek mèt hart en ziel in veur ziën vrouw **Sara**. Wèe vanne Rabbedabber ginge op bezeuk ôm ouch names ôs vereiniging hulde te bringe aan Dave.

Dave vertèltj: “De ouge zeen mich echt ope gegaon. Vriewilligerswirk is neet allein nuëdig in dees meujlikke tieje, de kriëgs ter ouch zoëveul veur trök. Ich waas dèk allein mer bezig mèt het wirk. Wirke, wirke en nog ins wirke. Tot ich op eine nacht neet kôs slaope. Ich zaat bjôs mèt ein fistel, dèe ich dinkelik hób opgeloupe van het veul te hël wirke. Ich veuldje mich slecht, het veuldje neet zjust miër. Ich hób de rest vanne nacht ligge prakkezere. Ich wildje gèer get trök doon veur de samelèeving. En zoë bèn ich in het vriewilligerswirk terecht gekômme. Ich zaat toch eine lange tiëd aane koëj en zoë haaj ich inne gang get ôm henj.”

Dave ging begin 2018 aane slaag es vriewilliger in het hoëshaoje van zien vrouw. “Het is geweldig desse get kins doon veur diene medemins, zeker es det ouch nog ins dien eige vrouw is. Ich ruëm 2 kiër inne wèek het aafwasmesjien oët. Det is

aardig gewirkjt en ich verdeen dao hiëlemaal niks mèt. Dèe gelökzalige blik van Sara es ze det oëtgeruëmdj aafwasmesjien zuët: dao duise het veur! Ich gèef iërlik tów: in 't begin waas het deils ôm mich get bezig te kinne haoje, mer veur ich het wis waas het ein meneer van lèeve gewore.”

Wèe vanne Rabbedabber vinje dit wirkelik ei prachtig veurbeeldj van wiej klein dinger ei groët versjil kinne make inne maatsjappiej. Lèeve de vriewilliger! Lèeve de vriewilliger van het jaor: Dave Bullen!

## GEWUÈN MÔPPE

**Jill Neyens** geit nao **kwaffeus Suzy**. “Gèe môtj mich van veur beginne knippe aan de froe, den zoë met eine haok veur miën oër door, den sjuin nao achter, get kekke knippe in diej lôkke achter de kop, en den rônjd de anger oër,” zeet Jill tege Suzy. Suzy kiëktj ins raar op en antwoordj: “Mer det trèktj toch op niks?!” Jill: “Det waas dich anders de veurige kiër good gelöktj!”

**Jos Craegs** en **Roland Dirx** zate in kaffee Sport. Opins kreeg Jos de klok inne gater. “Oei oei, ich haaj **Tammy** nog zoë beloofdj ôm oppe tiëd heivis te kôme.”



# G-TIËM MAASLANDJ NO BEZÖRGTJ ANDERLECHT TROUMA!

Det het **G-Tiëm** van MNO ferm langs heur sjoon begintj te loupe esse het ôs vreugs! Eigelik is het nao de gestole euverwinning tege De Rabbedabbers in 2017 (lès De Rabbedabber 2018) in eine kiër flink bergaaf gegaon. Of bèeter gezag: bergop mèt de rezultate en bergaaf mèt de feerpleej wiej desse det num's.

Eeder matsj wõnne ze, d'n eine tegestenjer nao d'n angere ging veur de biël. Toen ze aafgeloupe jaor ouch de Spesjal Olimpiks op hunne naam sjeve en mèt ein gouwe medaalie heivis kwame, ging het hèk hiëlemaal vanne dam. Dao mós en dao zouw eine karnavalswage geregeldj wèere

Staa's trop kòme Jos en Roland zich tege oppe straot.

Roland: "Waat zei Tammy gisterenach toen desse zoë laat bjuch kwooms?"

Jos: "Niks, en diej twië tenj wou ich toch al laote trèkke..."

**Jeugdprins Mathis** kwaam bjun mèt ei slecht rapport. Nèe, eigelik mèt ein hiël slecht rapport! Mama **Kristel** bekeek de punte en waas kwaod. "Biej zoë ei slecht rapport is ei flink pak rammel waal oppe plaats."

Boë-op Mathis zei: "Det liëktj mich ei good gedach, mama. Ich weit het hoës vanne **juffrouw Veronique** zeen!"

Boëveur laote manskèerels miër boere es vroluuj? Ômdet vroluuj neet lank genôg kinne zwiëge ôm drök op te boëwe!

ôm de speulers en begeleiders van het G-Tiëm euver het Dörp te rieje.

Det waas neet van ôngerhanjele, det waas van: "Maak mer det hèce ter stuit, anders zultj gèe het waal huëre waat oët geit zeen!" Wèe, Rabbedabbers, hõbbe ôs neet laote doon, mer de Rappetappers koste geine kantj oët toen bepaaldje luj (**J.M. en M.D.G.** ôm ze neet bij naam te numme) ter mèt dreigdjie ielemaal verkrege slaopkamerfilmkes van **Debbie Korsten en Bart Janssen** te verspreide. Logis det dèe wage al klaor sting veur eine tot 10 kos tèle...

Hiëlemaal inne euverwinningsroes haaje de speulers, speelsters en begeleiders van het G-Tiëm hõnger nao miër. De iëstvolgendje tegestenjer mós Anderlecht wèere. Mèt eine tillefoon van **Dirk Bogie** nao het sikretariaat van dees Brusselse klup waas det snel geregeldj. Dirk deej zich aane tillefoon veur es eine plechtige kòmmunikant, mer einmaal dao waas het ein iëwige sjanj. Eine dikke nak zègge wèe uch...

Ônger de matsj waas het ein en al gesjandaal. Roope, vlooke, tekkele mèt 2 puëj veuroët: het kos neet op. Het ging zoë wiëd det diej speulers van Anderlecht ter hiël aan ônger door ginge. De köpkès ômliëg en twiefele euver belkes diej ze normaal mèt de ouge toe speule. Het G-Tiëm wôn mèt aardig get goole versjil. Ouch nao de matsj ging de psiechologisse oorlogsveuring wiejer. Dao stông gein maot op het oëtsjiete en oëtkaffere.

Sins diej wedstriëd tege het G-Tiëm speultj Anderlecht zõnger het minste vertròwwe miër. Ze zeen



bezig aan het slechste seizoen sinds minseheugenis. Boë zouw det aan ligge? Wèe weite het waal! Det G-Tiëm kraaktj dich boë desse bij stuis!

Het is veur de moment zelfs zoë erg det **Dave Derenette** es hèce dich ein handj geuftj keihèl pitstj, tot desse door de bein geis van piën. Gewuën ôm dich diën plaats te laote kinne!

Wèe vanne Rabbedabbers zeen det meug. Wèe gaon dao paol en perk aan stèlle en ze ins in het zandj doon biëte! Aafsprak in oktober! Den winne wèe mèt sprèkendj gemaak en den is het gedaon mèt diej dikkenakkeriej!

Voetbal is tof, haoj het tof!





## FRITUUR 'T HAPJE GEIT VOLOTTOMATIS!

Biej frituur 't Hapje höbbe ze ei gaat inne mèrret gevônje. Gedaon mèt det wachte. Gedaon mèt diej ergernisse van klante diej kônstant wèere veurgestoke door luj diej ein tillefonisse bestèlling aaf kôme hole. Gedaon mèt diej ellendige volgnummerkes, mèt diej uële diej det vergèete te pakke en den achteraan kinne aansjuëve inne wachtriej es ter eine slummerik dèe nao hun kumtj waal ei nummerke trèktj. Gedaon ouch, in het geval van **Marc**, mèt oëtgesjeete te wèere door **Jacqueline** es hèe weer ins vergèete waas diej rol te vervange en de hiële frituur in chaos belandje. GEDAON!

Ze wore het met anger weurd kaök, Jacqueline en Marc, en waat duise den es modern slave van het fritwèeze, gebuktj ônger het sukses van d'n eige zaak? Zjust! De geis nao ôzze nôwwe kômptoeterwinkel **EASYCOM** en de zeuks same nao ein oplossing!

EASYCOM kwaam al snel aaf mèt het gedach ôm ein websaajt te make, boë-op Jacqueline en Marc hun hiël sneks, fritte, hamburgers en hoësbereidje waar in ei soort van websjop kinne zette. Det wirktj perfektj en de luj kinne inne gang mèt de bankkaart betale. Den hoöftj Marc zich ouch neet miër kepot te prakkezere wiejveul hèe môt trök gèeve op ei breesje van 20 euro, es de bestèlling pakweg 15,40 euro is. Op jaorbasis spaarse dich weer ei paar daag oët, esse al

det tiëdverlees optèls. De websaajt van 't Hapje hingtj ôngertösse al ei paar maondj inne locht en zoëwaal oëtbaters en klantje zeen razendj entoezjast.

Esse dinks det het dao-biej ophiltj, bèsse mis! Dao is nog miër innovasiej op kômst. Marc geit al jaore ins gèer op vakansiej oppe Hollènj, en is wirkelik gefassieneerdj door diej apparate ôm sneks oët de moor te trèkke. Hèe heet nôw Jacqueline zoë wiëd gekrege ôm ouch in 't Hapje eine stap wiejer te gaon den allein mer de websaajt, en bij het versjiëne van deze Rabbedabber kinne wèe es primeur mèt gèeve det ze eine okkaziej krokkettewandj oppe kop höbbe kinne tikke! Det dink weurdj op dit eigeste momentj nog ôntsmètj en zal normaal gezeen tege de stoet geïnstalleerdj môtte zeen. Marc meindj det dees investeringe zichzelf snel zulle trök betale. De produksiej kintj namelijk nog wèere opgedreve en dao hoöftj neet miër gekaldj te wèere, allein mer gebakke. Jacqueline hiltj de bestèllinge vieja internet inne gater, en steurtj op heur beurt eine vakansiejwirker aan, terwiël Marc zônger ôm te kiëke de 'snekmoor' vol probeertj te haoje.

Wèe vanne Rabbedabber vinje dit alweer eine sjikke primeur veur ôs dörpkke. Neet allein opwindend en röstig, mer ouch op kulinèer gebed grensverlèggendj.



# IELEGAAL KROSPARKOER WAAS MER KORT LÈEVE BESJORE!



De oëtbreijing van Leuerbrook get gepaarjd mèt hiël get geraos van buldoozers en kammejaos. De aafgeloupe maondje leeke de veurmalige landbôwgrôndje miër op ei krosparkeer es op bôwgrôndj, mèt al diej berge èerd en diej sliëkwèege door 't veldj op.

Det waas ouch ôs Kinderse reliekrossers neet ôntgaon. **Remco Zuidam, Dirk Mooren en Danny Kunnen** hōbbe zich ei paar wiekendje oët gelaote en organiezeerdje get ielemaal wedstriëdjes. Det bringtj volges de hiëre miër op es eine èetdaag. Jo Brouns wis ter waal van, mer hēe verliëndje gedoogsteun. Het waas het genaöl en gezèeg van Danny neet wèerd veur diej paar maond, zoë dach ôzze börgemeister. Toch ging het mis!

**Bart 'VDS' Vanderstegen** huërdje namelik weije det 'r goojekoup gekrostj kōs wèere in eige dörp. Ziën uigskes begōste ter van te blinke en hēe waas op slaag zoë wildj es haas. De krostuf oët de

graasj, d'n helm oppe kop en nao Leuerbrook! Einmaal dao aan gekōme, waas ter nog gekker es iëst. Fokswildj kroop VDS d'n tuf op, reep nog get nao Kunnen, Mooren en Zuidam det "hēe goesting haaj ôm nog ins good te raoze en det det nao de geboorte van ziëne twiëdje kleine mèt **Yolanda** al lang geleeje waas", en hēe gaaf ein streep gaas boë desse bang van weurs.

Ôm ei lank verhaol kort te make: inne iëste bocht sloog VDS ziën steur haoks ôm, en knaldje hēe mèt de snoët tege de grôndj. Sleutelbein kepot en niks miër dao. De flikke en d'n ambulans kwaame ter plaatse en diej stëldje nateurlik vervèelendje vraoge. Jo Brouns kos neet anders es de boel te laote sloëte. "Ein spiëtige zaak, zeker veur de echte krossers," stōng Danny Kunnen de pers te woord. "Het zeen altiëd diej ônnuëzelëers en diej mafkeeze diej het nao de kloëte helpe veur de sirjeuze luj..." Wēe vanne Rabbedabber kinne Danny allein mer geliëk gēeve...

## WIST GÈE DET...

... 33 jaor geleeje, in 1986, **Herman 1 Janssen en Tiny 1 Janssen** het Prinsepaar van Kinder, en **Bart 1 Lemmens en Ilse 1 Rietjens** het Jeugdprinsepaar wore.

... 22 jaor geleeje, in 1997, **Marc 2 Lemmens en Suzanne 1 Vandewinkel** groëte Prins en Prinses wore, en **Jeroen 1 Peeters en Sara 1 de Graef** Jeugdprins en Jeugdprinses wore.

... 11 jaor geleeje, in 2008, **Bennie 1 Verlaek en Wendy 1 Thaens** es Prinsepaar, en **Yves 1 Gijssels en Cheyenne 1 Breukers** veurop ginge es Jeugdprinsepaar.

... Wēe al diej aod-prinse en -prinsesse oppe zitting nog ins hōbbe laote mèt sjoenkelle wiej in hun 'jōng jaore'.

... Diej Prinsezitting trouwes, net wiej de Jeugdzitting inne naomiddig, ei euverdōnderendj sukses is gewèest.

... Wēe eederein dēe heet mèt gewirktj aan diej Zittinge, veur of achter de sjerme, oët de grôndj van ôs hart wille bedanke. Gēe zeetj het blood in ôs aojers, de locht in ôs lōnge. Gēe zōrgtj 'r veur det de karnaval lēeftj in Kinder!



# ROEL BOSMANS

## KIKTJ AAF!

Het geit neet good mèt Kinderse heldj **Roel Bosmans**. Hèe zitj 'r rejaal door en is opgepaktj in ein aafkikkliniek, veur ein kômmunikasiejverslaving. Wèe vanne redaksiej ginge buurte bije **Katrien**, diej heur verhaol aan ôs deej.

**Katrien:** "Mersie veur uch bezörgdjheid en kômpassiej. Het geit inderdaad neet zoë good mèt Roel. Stres dink ich. Sins det wèe mèt Bosmans en Co ouch zake begoste te doon mèt het boëtelandj, zaag ich het langzaamaan de foute kantj op gaon. Vreuger waas vertèlle, zèk maar 'kômmunisere' veur Roel en oëtlaotklep. Ein hobbie. Stickers laote make mèt 'KDR', 'Dankziej Bosmans en Co stuit hiej geine angere zeiver' en 'Bosmans en Co waas hiej' d'r op, en diej den oëtdeile of zônger het te vraoge örges op plekke: dao haaj ter alzelêeve kop in. Mer gaondjewèeg kwaam dao eine ôngezôndje dwang bije kiêke."

**Rabbedabber:** Eine ôngezôndje dwang? Zaat het toch zoë deep?

**Katrien:** "Zet mer zeker! Op het

lèst wou 'r van alles waat hêe deej ein basj laote make. "D'n oëtlèg is al waat teltj," zag Roel mer d'n hiële tiëd. Zoë is det begos mèt get deuk van ôzze kleijerwinkel KARO. Iëst op ein redelik klein bash, mer naoderhandj eederskiër groëter en groëter. Tot ich opins de gevel van ôs hoës oppe Breejerwèeg langs 2 kantje hiëlemaal vol zaag hange. Ich zei nog 's aoves ônger het èete: "Roel, bèsse neet aan 't euverdriëve," mer hêe wimpeldje det weg. "De môs de luj laote weite boë desse mèt bezig bès," en daomèt waas veur Roel de kous aaf.

**Rabbedabber:** En toen ging het opins hiël snel bergaaf?

**Katrien:** Tja. 'Hiej bôwtj Bosmans en Co aane toekômst' op ein lèevensgroëte basj aan ôzze nôwbôw op Biësel aan, det vônj ich al op het rendje. Mer ouch nog ins basje gaon zette aan projekte diej neet van ôs zeen: det waas ter zwaor euver. Zèk nôw zelf: aan de vreugere fômfarezaal boë strak d'n Aldi geit kôme, dao zètse toch gein basj mèt 'Hiej heet Bosmans en Co niks inne pap te brokke g'hadj' niër!!! Laot staon desse oppe



Goërt ein plaat inne grôndj houws mèt dao-op: 'Bosmans en Co hiltj vanne nateur. Hiej hóbbe wèe gein planne.'"

**Rabbedabber:** En toen hóbse ingegrepe...

**Katrien:** Jao, toen hób ich **dokter Bullen** gebeldj. Dèe waas gelökkig snel hiej. Hèe môt mer efkes door d'n hoof op kôme nateurlik. Wèe hóbbe den same beslistj ôm Roel efkes eine taajm-out te gèeve. Mèt de mediekasiej diej 'r kriëgtj enne teerapie zeen wèe het snel bèetere. 't Is ein kwestiej van veul te kalle. Door te kalle geraaktj hêe ter weer snel oët, det weit ich zeker.


**Rabbedabber:** Wins hum names ôs ei spoedig herstèl. Het is good det gèe uch verhaol hóbte kinne doon in ein gezèt diej door 90 persent vanne Kinderse luj weurdj gelèeze. Wèem wètj kinne wèe zoë anger wuillesse eine speegel veur haoje. 't Is bèeter ôm simptome snel te herkinne en dadelik in te griëpe. Want zoë ein verslaving is neet allein erg veur het gezinslêeve, het kostj ouch nog ins henj vol geldj!

**Katrien:** Esse det mer wèts. Bedanktj veur ugge steun.

**Rabbedabber:** Det is gèer gedaon. Gèe wètj: zoë zeen wèe. Es wèe eemes kinne helpe zeen wèe drek dao!



# BEKKERIEJ MARTENS GEIT MÈT DE TIËD MÈT!



Es ter get is waat **Bekkeriej Martens** kintj, is het zônger fout inspeule op trends, heite hangjēzers en verangerendje maatsjappelikke teema's. Neet veur niks det ze veurig jaor inne priēze zeen gevalle oppe Unizo Awaords!

Ouch dit jaor zörgdje **Guy en Daniëlle** weur eine instèek dēe perfektj aanslutj bieje de maatschappiej van vandaag d'n daag.

“Anno 2019 maag het get rôwwer zeen,” verteldj ôs Daniëlle. “De luj zeen veul botter tegenein en eederein vindj det det môt kinne. Esse kiëks det eine piepo gliëk Trump het mèt get van z'n oëre te make en get luj oët te sjiēte tot presiedent van Amerika heet gesjôptj, den is het nogal wiesdet de wêereidj veranderdj is. En gēe wètj: det soort zake veule Guy en ich hiël good aan. Wēe hōbbe drek ôs perseniël ingelichtj det ze

de ottomaat en het sjern veur de wachtnummerkes neet miër hove te gebrūēke. Laot de klante mer get stehelle es ter eine veur kruptj. Det doon de minse weer gēer.”

“Mer wēe dachte al drek ei stepke wiejer,” zeet Guy. “Diej aowbollige benaminge van al det broēd en patieseriej, dao mōtte wēe get aan doon, zoē zei mich Daniëlle. En ich gaaf heur nateurlik drek geliëk”, geuftj Guy ôs mèt eine vètte knipoug mèt. “Wēe hōbbe eine hiële woonsdig geprakkezeerdj euver hedendaagse, hippe name veur ôs waar en ich maag het zēgge: det is ôs good gelōktj. Wēe hōbbe eine hiële tiēd ônger angere ‘Waldkorn Verdomme’, ‘Kus miën Berlinerböi’, ‘ei Grieske Nōndedju’, ‘Smurfvleai Miljaar’ en ‘Stèek det Flutje boë de Zôn neet Sjiëntj’ verkoch. Tot dēen triestige daag ei paar wēeke geleeje...”

Wēe zeen det Guy het meujlik kriēgtj en laote hum efkes ziēn traone vēege. “Het zitj zoē,” vervolgtj hēe snikkendj het verhaol.

De kōnkullega's van **Bekkeriej M&M** oppe Brookhook zeen ôs te slum aaf gewēest. Diej haaje nateurlik drek door det wēe op goud zate, en hōbbe achter ôzze rōk op al diej prachtige name ei patentj gepaktj. Eigelik good bekeke van M&M, mer ich slaop ter al wēeke neet van. Opins stōng hiej eine deurwaarder aane koēj mèt ei pepeer. Alles hōbbe wēe trōk mōtte verangere. Behalve ‘Waldkorn Verdomme’. Det wore diej van M&M vergēete te patentere. Det is dus jaomer genōg het innigste waat wēe nog kinne aanbeeje in het segment ‘Rōwwer Bankèt’. Ech ein spiētige zaak.”

Wēe hōbbe Guy en Daniëlle den wiejer mer mèt rōst gelaote, mer neet veuraliēr ei stōkske Waldkorn Verdomme te preuve. En het maag gezag: det smaakdje lekker, dedju!

Biej M&M is **Maarten Ubachs** druēg in ziene kommentaar. “Iēste lēs inne bekkerssjōël: vreug opstaon!” aldus Maarten. Doa heet ‘r waal geliëk in...

# OPERASIEJ ZUËVER HENJ BIEJ MAASLANDJ NO!

Inne naosleip van Operasiej Zuëver Henj in ôs vaajerlandse voetbalkômpetiesiej kwaam ouch ôs eige klup Maaslandj NO in het oug vanne storm. Det 'r miër aane handj waas es allein mer get gefoetel, diej matsjfiksing en det fianansjeel gesjoemel op het hoëgste nivo, det wis zelfs de lômpeste uël, mer det hiej zoë kortbiej weer eine stinkendje bèerpöt zou wèere ope getrokke... Nèe, det kwaam veur eine boëtstaondjer ônverwachs.

De bal ging aan 't rolle noadet penningmeister **Rob Ceysens** get teveul offiesjeel transaksies haaj

gedaon vanoët de zwarte kas. Bekans dageliks stông hêe geldj wit te wasse in 't Waspunt van **Roel Bosmans**. Neet slum om dao kontienue euver het Dörp te loupe mèt eine zak geldj es doa **Henri Christis** rôndj löptj dèe al inne gaate huldj. Bosmans ziëne bookhaojer veuldje de buj al hange, en op ziën aanraoje heed Bosmans het Waspunt ingeruuldj veur ein bookhaojerskantoër. Bekwaom luj wilse leever kort bie dich haoje, rizzeneerdje Roel. De wèts noëjts boëveur det van pas kumptj. Dao wore trouwes toch ôm het hondsgezeik stökke aan dèe kraom in det wassalon, dus Roel

sloog twië vleege in ein klap!

De vermoedes van matsjfiksing begoste de kop op te stèeke nao de euverwinning van Biësel inne fusiebeker (augustus 2017) tege groëte broor Maaslandj NO. Dao zaat gei reukske mer ein hiël dikke Biëselse booregeur aan. Toen ei paar wèeke later **Rune Breukers** 14 kiër in ein matsj skoordje veur de dames van MNO heet het gerecht ingegrepe en ein ôngerzeuk opgestartj. Toen Maaslandj NO, kampioen speuldje waas het waal hiël kloar en duudelik: hiej klopdje get neet. Noa ôngerhalf jaor intensief ôngerzeuk zeen de volgendje luj opgepaktj:

Spilfiguur is sponsor bekker **Guy Martens** dèe ônger angere vlaaje gebruektje es stèekpenninge. Biej eine inval vanne resjersj hōbbe ze tiëntalle leeg vlaajedoëze gevōnje. Guy ziëne oëtlèg toen ze hum oppe

**Guy euverhandigdj ein van ziën leeg vlaajdoëze aan speuler Bart Janssen. Wèe dörve ter geldj op te zette det dao eine dōbbele bojem in zaat.**



**Rudy paktj het zich ter van bieji ziëne sauna en ziën zwumbad.**



**Jan VDB wastj ziën henj in ônsjöldj...**



**Peter, Pieter en Jan op diejsjoëling bieji Mogi Bayat.**

ruëster lagte: “Ich verzamel diej gewuën!”

**Rudy Poelmans** is es vertegenwoordiger van CSM Bakery vriend aan hoës bij de bekkers, en is achter de sjerme bij MNO de man deë zich bezig hiltj mèt de transfers van speulers. Oppe veurgrôndj kumptj Rudy neet miër, mer zônger nog in het organiegram veur te kôme streek hêe waal nog riante bonusse op van versjillendje transfers. “Dikke kwatsj,” meldtj Rudy aan ôs redaksiej vanoet zien tôn sauna aane randj van ziën zwumbad, nippendj van ei glêeske sjampoës.

Ouch veurzitter **Jan Vandenberg** kwaan in beeldj bij de speurders. Jan deej ter zich snel vanaaf mèt: “Ich hób det allemaol neet geweite. Ich wis van niks...” Hêe wastj mèt anger weurd ziën henj in ônsjöldj!

Jeugdveurzitters **Pieter Vanhoef** en **Pé Hoedemakers** gaon ouch neet vriejoët. Zië hooldje piepjông talentvolle speulers weg oët ôngerôntwikkeldje streeke wiej Biësel, ôm dees later veur groof geldj te kinne doorverkoupe. Wêe koste ôs handj lègge op ein foto diej getrokke is op ein biejsjoëling door neemes minder es Mogi Bayat! En Jan VDB zal ouch deze kiër van niks hóbbe geweite...

Speulers **Diego Gielen** en **Frank Kessen** weère ouch verdacht. Diego heet ôngertösse de rôwbôw van zien hoës rechtstaon (dankzij hoofdsponsor Steingood?). Kessen heet allewel zien sjoon aane haok gehange, offisijeel weges ein blessure mer wêe weite waal bëeter.

Ein triestige affeer, hiël det gesjoemel bij Maaslandj NO. Mer de gesjiedenis wiëstj het al iëwe oët: het vergtj breij sjouwers ôm de macht te kinne drage, en boë veul geldj in ômgeit: dao is het van op te passe.

## WIST GÈE DET...

... Diej **Gaaplepels** in Biësel mèt hunne 11de vanne 11de spek aan 't broaje wore. Ônger eine brandjmelder inne Stegel. Gevolg: alarm aaf enne brandjweer op dao aan. Jông, jông, jông!

... **Jan Vandenberg**, veurzitter van Maaslandj NO, het **G-Tiëm** ei groët fiëst heet beloofdj es ze nog eine kiër de gouwe medaaliej mèt nao Kinder bringe. Det is dus ein kwestie van ei paar maondj nog!

... Ôzze **Vorst Mark** zich oppe repetiesiej vanne Prinsezitting aardig piën heet gedaon. Hêe waas diej kuëkes vanne Raod van Èllef aan 't veurdoon wiej desse wiej ein balleriena euver de bühn op vluëgs, mer sprông zich eine tiën oët de kôm! “Wêem is nôw het groëtste kuëke!” reepe diej vanne Raod. Staags trop stông het in alle meugelikke karnavalsepkes: ‘Goudvès oët de kôm!’ Det waas lache...

... **Keuninklikke Sjötteriej St. Servatius Raam** dit jaor is oëtgerope es **Ridder inne Orde vanne Rabbedabbers**. Ziej hóbbe ter mèt het nao hiej hole van het OLS veur gezörgdj detter eine geweldige dienamiek ging door hiël het vereinigingslêeve van ôs fusiej. Ouch inne carnaval leet zich det veule. Eedere ginerasiej zouw ins eine kiër zoë ein OLS môtte kinne mèt make, dunktj ôs!

... Wêe **Vera Eerdeken** weer bedanke veur het helpe poetse vanne Bunker. Vreuger stông ziej altiëd paraat toen det nog ein gewuën sporthal waas, en ouch nôw is ze nog altiëd sjef aaftrèkker en dweil!

... **Marc Meurs kroënridders** is gewore inne Orde vanne Rabbedabbers. Wêe wille zoë ôs appresjasiej oëtdrökke veur alles waat hêe de lêste jaore veur de Kinderse carnaval heet gedaon.

... **Jurgen Caris** ôs nôw lid is bij de Raod van Èllef. En det Jurgen al drek de henj oët de môwwe heet moge stêeke bij het make van ôs nôw bühn!

... Wêe aafsjeid hóbbe gepaktj van **Danny Jaroszewski**. Danny waas ein van ôs lede mèt de langste staot van deenst en heet, same mèt Evelyne, alzelêeve veul gedaon veur de Kinderse carnaval. Wêe wille hum en Evelyne dao van harte veur bedanke.

... Wêe mèt **Jurgen Caris** ouch ein nôw lid kinne verwelkôme. Jurgen is papa van ôzze aod-jeugdprins Kyrann.



# FLITSE VAN OPPE





# PRINSEZITTING!



# GEWUËN MÔPPE

**Margot** weurdj snachs wakker en merktj det **Jack** neet in béd liktj. Ze trippeltj nao de keuke en zuët hum dao zitte. Mèt ein heite zjat koffie zitj 'r veur zich oët te stare. Hèe veugtj zjust ein dikke traon van ziën wang. "Waat is er?" vreugtj Margot bezörgtj.

"Ich herinnerdje mich opins van toen wèe ôs 20 jaor geleeje liërdje kinne. Ich waas zjust 18 en dich 16, wètse nog?" vreugtj Jack stil.

Margot aaitj Jack euver de kop, ônroertj ômdet hèe in zoë ein geveulige bui is.

"Ich weit het nog," fluisterdj ze. Jack sliktj ins, veugtj nog ein traon weg en zeet: "Wètse nog det pa bjuch ôs betrapdje oppe achterbank van miëne otto?" "Jao, det weit ich nog!" lachtj Margot. Jack geit wiejer: "Wètse ouch nog wiej ter ei geweer op mich richdje en reep: "Ofwaal trouwse mèt miën dochter, ofwaal steur ich dich veur 20 jaor nao het gevang!"

"Jao, ouch det weit ich nog," zeet Margot.

Jack begintj te beuke en zeet: "Ich zou vandaag zeen vriej gekôme..."

**Ed Smeets** en **Linda** zitte smörges aane boterhamme. Linda leustj de gezèt mèt het noets en Ed heet de sportgezèt vas.

Linda: "Zèg, Ed, ich lès hiej det het beer en de illetrik gaon opslaon."

Ed: "Den drink ich miën pintjes in 't vervolg waal in 't dônker."

# HET BÈSTE VAN GRENSLANDJ AKTUWHEEL 2018!





# KINDERSE DÖRPSDICHTERS KINNE NEET MIËR DOOR DEZELFDJE DEUR!

Groëte kônsternasiej in Aod-Kinder: dao is eine bitsige taalstriëd los gebarste tösse **Hub Vaneygen en Tei Van Dael** en wèe kinne uch oët gooje brôn zègge: het geit 'r neet zaocht aan tów! De reeje is simpel: allebei dees stielobiëters höbbe mèt ei paar maondj versjil eine gedichteboek oët gebrach. Tei in 't Kinders plat, en Hub oppe lëtter. Aangezeen allebei ôs lokaal heldje het ouch môtte höbbe van volk oët de eige gemeindj, vreeze ze nateurlik det d'n eine d'n angere ziën klantje inpiktj. Wèe ginge ins polse en höbbe inne gang geprobeertj de boel get te susse...

Tei sjoot al drek oët z'n slôffe toen de naam Hub nog mer veel. "Det stökske pretensiej! Wèem meindj 'r waal det 'r is! Mèt ziën gewauwel

oppe lëtter! Hèe kintj bèeter bij de iëst kômendje graafwirke in Kinder ziëne veurraad beukskes inne grôndj laote stèeke. Es ze dèen èerd den binne 300 jaor weer ins ôm spaaje en ze vinje dèe nèst, is het missjien get wèerd es archeologise kwatsj!" De sjoëm stông Tei oppe môndj. Het zitj duidelik deep...

Hub van ziëne kantj leet zich ouch good gaon. "Plat is good ôm te kalle, mer de geis toch neet op diej meneer sjrieve?! Dèe kintj zich toch geine dichter numme? Ein sjanj det 'r mèt diej 'Driejlingskes' ei bitje miën aafzètmerret bezoedeldj. Zwaak trouwes ôm diëne boek te vernomme nao waat 'r zjust instuit. Ich höb den toch eine oriezjienelere titel bedach veur miën lieterèer parelke. En es ich det zoë zeen is de mizeriej nog neet

achter de rök. Dèe maf geit bliëkbaar nog ei twiëdje deil oëtbringe! Det 'r mer good oppastj of ich zweij hum mèt ein echt stökske lieteratuur tege ziën oëre: ich kwak hum mèt miëne boek tege de kop!"

Det lèste vônje wèe eigelik waal ei good gedach, dus wèe stèldje de twië kemphane ei duel veur. In eine bôksrink in sporthal De Sjans (geregeldj door **Alex**) moge ze zich ôm beurt eine zwaars gèeve mèt hunne boek. Dèe het iëste daal geit of het 'm aaf boltj, verluëst de striëd en maag allein nog mer verkoupe van aane eige koëj. De veurraode bij de Kinderse gezèttewinkels môtte den oët d'n hanjel wèere gepaktj.

Ôndanks dit geweldig idee is ter nog neet drek ein indj gekômme aan de historiej. Tei en Hub zeen waal getèldj 2 daag, 14 ore en 36 menuute bezig gewèestj, veur det ze het op ei geliëspel höbbe gehaoje. Het volk waas van mizeriej al lank vertrokke en KIVOC waas kwaod ômdet hun trèeninge neet koste doorgaon. Oëteindelik gave honger en sloap d'n doorslaag. Stiëfköp zeen het allebei, esse het aan ôs vreugs...

# LANDELIKKE GILDE 'LICHTJ' KINDER OP!

Aafgeloupe jaor heet de **Landelikke Gilde** Kinder opgelichtj! En het sjoenste van al: ze hōbbe dao neet ins ei geheim van gemaakdj! Oppe affiesj stōng het klaor en duudelik: 'OPGELICHTJ'. Tōsse haokskes! De meiste luj oēt Kinder weite bliëkbaar neet det waat tōsse haokskes weurdj gezat zoëgenumdje beeldjspraok is en dus neet letterlik te pakke is. Angerzijds mōtte wēe waal tōwgēve det door al diej kēeskes langs de straote ter waal get verwarring kos ontstaon. Of wiej de verseering op ei fiēst de luj aane essensiej duit veurbiej gaon... Wēe vanne Rabbedabber ginge (alweer) op ōngerzeuk oēt en kwame ter achter det de Landelikke Gilde

neet allein konneksies heet mēt de Boorebōndj, met ouch mēt de hormonemaffia!

Geluid het of neet, mer de groēte leider van dit spel is neemes minder es **Marc van Hover!** Euverdaag geit Marc door het lēve es eine gerespekteerdje verkesboor, mer nao ziēn ore kumptj 'r tot lēve es de Al Capone van Kinder, mēt de Landelikke Gilde es dēkmantjel. Alzelēve heet neemes det door g'hadj, mer gaondjewēeg veuldje Marc zich zoē ōnaantastbaar det hēe minder veurzichtig is gewore. Getuēge dao-van de ekspliesiete affiesjes mēt aanhollingsteikens zoē-es Kinder 'Opgelichtj' of Kinder 'Fitsendj Verkinne'. Det 'Fitsend Verkinne', dao zeen wēe nog neet oēt waat dao de waore bedoeling mēt waas, mer det het inkel en allein mer ōm fitse ging, dao geluive wēe niks van.

Good, trōk nao Kinder 'Opgelichtj': de Kinderse hold-up van het jaor. Marc van Hover haaj mēt ziēn kornuite **Jos Vandewal, Karel Bovend'aerde, Leon Pouls en Eric Peeters** ei geweldig plan oētgedoktertj ōm



de Kinderse luj ins ferm aaf te zette. Vandewal kreeg de opdracht ōm ōnger het nōw podium vanne fōmfarezaal De Bunker verleechting en stroom te veurzeen. Dao zouwe namelijk de vergaderinge in bōkkeriejerstijl doorgaon. Achteraaf gezeen neet zoē ei good gedach want **René Lantmēeters** kreeg al 5 menuute nao het begin vanne iēste vergadering piēn in ziēne nak en rōk. Veul te krap nateurlik. Ouch **Rudi Vanaken** kōs neet good gewēere, mer dēe is ter toch in geslaagdj al kuēmendj en zuchtendj pin te haoje.

Het plan bestōng ter in ōm mēt zoē weinig meugelik kōste zoēveul meugelik geldj binne te sjōppe, en te doon esof het ich-weit-neet-waat ei fiēst is gewēest. Bespare op al waat kōs dus. Karel haaj ei good gedach: eine tombola zōnger priēze. Aan het begin van d'n aovendj eederein get leutjes aansmere, vervolges eederein op ein wanjeling steure en vervolges mēt gei woord miēr reppe euver dēen tombola. Mōs ter toch eine ein kritisse vraog stēlle, den mōs mer eederein hetzelfde verhaol vertēlle det de trēkking pas staags terop door zou gaon in de ruīne van Malpeltuus. Tege den zou toch neemes miēr weite det 'r diej leutjes nog oppe maal haaj.





Het hiël fiëst is gewirkjt mèt goojekoup Duits beer, det door niks vermoedendje vriejwilligers in leeggood van Cristal is gesjödj.

Het teniëlstökske waat door **Maria van Bèr Smeets** en Leon Pouls d'n hiële aovendj is opgeveurdj in eine ope kammejao waas nog zoëget sjiks. Det waas gei teniëlstök, mer eederskiër dezelfdje 5 menuute sketsj! Niks wèeke en dage geoeffendj, mer gewuën ei paar oor op veurhandj 5 menuute tekst oët de kop geliërdj! Oplichteriej van de ergste soort!

Het aller ergste gebeurdje op zôndig, bij de allerlèste kiër fiëste in Malpertuus. Ei groët deil van Kinder waas oppe bein gebracht, de kop wildj gemaaktj door ein good opgezatte Feejsbookkampajn boë de nostalgie vanaaf droop. Waat wèe neet wiste waas det het besteur vanne Landelikke Gilde het al wèeke haaj euver 'het fiëst vanne 100%'... Det ging euver 100% winst make, dedju! Geine Sabam en gein brandjverzekering betaaldj! En verwörming môs ter ouch neet wèere opgezat, want dao zate gein rame miër in det dink! Toen eine kritisse aanwezige ein opmerking maakdje vanne povere brandveiligheid, antwoordje Jos Vandewal hiël druëg: "Stèl dich neet

aan, hiej is niks miër waat branje kintj, 't zeen allein nog mer brikke."

Gèe zeetj, bèste lèezer, ze hōbbe ôs allemaol flink bij ôs pietje g'hadj. En het sjoenste van al: wèe wiste op veurhandj det wèe 'opgelichtj' zouwe wèere. In 't vervolg is eine gewaarsjuwdje mins ter 2 wèerd. Mer iërliek is iërliek: es het eeders kiër zoë eine sjikke ambiejaos is es de Gilde get organizeerdj, den laote wèe ôs leever hiej oplichte es op ein vakansiej in Tunesië! Want: het waas fenomenaal!



## GEWUËN MÔPPE

Bij **Wout Hoeken** oppe boorderiej loupe ouch get kippe in 't rōndj, mer jaomer genôg heet de fipronilkrisis ter keihèl ingehaktj. Al ziën hinne môste wèere geruëmdj en ouch de haan môs ter aan geluive. Wout bleef neet diej de pakke zitte en steurdje Lisbeth nao de Bōndj veur get nōw kippe en ouch veur eine nōwwe haan. Det biëst bleek echter zoë hitsig en heit es get. Hèe vergreep zich op eine daag al aan alle kippe. Daonao môste de èenje ter aan geluive en ouch det waas neet genôg veur de übergeile haan.

Zelfs de ganze wore neet veilig veur hum. Toen later ouch nog ins de kat en d'n hōndj bereeje wore, vōnj Wout het good gewèest. "Jōng, doot het ins get rōstiger aan, dich pōps dich nog ins kepot!" reep Wout nao het biëst.

Det bleke profetisse worde, want de volgendjen daag laag d'n haan mèt de puëj inne locht inne wei. Zelfs de giere cirkeldje al rōndj en kwame korter en korter.

Ôm zeker te zeen det d'n haan de piëp oët waas, gaaf Wout hum eine sjot.

"Jōng, klōetzak!" reep hèe nao Wout. Wout sjrok en stameldje: "Mer, ich dach desse doëd woors?"

Zeet d'n haan: "Besse gek, mafkees, ich wou allein mer diej giere lokke en ich haaj ter bekans eine te graze!"



# WIRKDRÖK KINDERSE ZELFSTANDIGE VREEKTJ ZICH!



Dao bereike ôs miër en miër sienjale det de gemiddeldje Kinderse zelfstandige kreuntj ônger eine stijgendje wirkdrök. Det zou jaomer zeen want wêe hōbbe ôs zelfstandige broëdnuëdig. Wêe ginge ins polse en teikendje volgendje getuëgenisse op.

**Traiteur Peter Creemers:** “Het is hiej altiëd poëpdrök, en zeker mèt de fiëstdaag is het neet te doen. Veural ôs gezin heetj dao ônger te liëje. Aafgeloupe Keesmis barsdje de bōm. Ôs kinjer, **Tanja** en ich hōbbe eigelik nog noëjts eine Keesmis gezellig same nao Home Alone kinne kiëke. Vreuger gebeurde het waal ins det de kinjer den snachs riejerendj langs ôs bèd stōnge, en ich dink det det jaorelank trouma ter nôw is oët gekōme. Wêe hōbbe den mer aafgesproke det wêe volgendje zomer efkes veur ei wiekendj de keesboom

zette, kalkoen make ônger ôs 4 en den same nao Home Alone kiëke. De zomer is get

minder drök en den môt het mer zoë. Hopelik duit het get aaf.”

Wêe trokke van bij Peter en Tanja nao **Christa van Bèr Royakkers**. Ouch Christa zuët het bestaon es zelfstandige minder en minder zitte.

**Christa van Bèr Eërdbiër:** “Bèr en ich kinne mer eine kiër per jaor ins op vakansie. In ’t midde vanne wintjer. Bèr ziëne kop stuit swinters allein mer op skieje. Dèe is dao gek van. Ich neet. Ich dink den altiëd: alweer skieje, alweer dèe mōttige snië. Ich bèn det zoë kaök es kaoj pap. Kinne wêe noëjts ins inne zomer nao het strandj...”

Schrijnendje toestand weeral. Zou dèe boorestiel den echt ônminselik zwaor zeen? Ouch ins ôs leecht opstèeke bij **Jan Linssen!**

**Jan Linssen:** “Och diej kinne get doon ôm niks. Ich bèn indertiëd boor gewore zoë-det ich zeker neet

ôm het hōndsgezeik op vakansiej môt gaon. Mèt veurbedachte roaje de boorestiel in geroldj zèk mer. **Reinhilde** wètj det en es hèt ins gèer nao het boëtelandj geit, boektj ze zich mer ein bōsreis nao Spanje mèt ein of angere Vlaomse artiëst.”

D’n eine zelfstandige is d’n angere neet, zulle wêe mer zègge. Wiej zouwe anger zelfstandige ei gebrek aan vakansiej ervare? Bij **Bekkeriej Martens** sloëte ze regelmaotig veur ter ins op oët te gaon.

**Guy Martens:** “Ich gaon den waal dèk genōg, mer mèt miën biejoritmte hōb ich ter geine zak aan. Es de aniemasiej begintj, snaktj miën liëf al nao aovendjèete. Gank mer ins pingponge mèt eine rômmelendje maag. Den houwe op al waat bewèegtj mèt diej bet. En nao het zoëveulste kepot geslaage pingpongbelke, beginne diej angere zich te ergere. Weg sfeer. De zuës: Veul op vakansiej gaon wiltj neet zègge desse d’n tiëd hōbs ôm op diën stōkke te gerake.”

Vakansies zeen dus ei geveulig teema, mer wiej zou het zeen mèt de koste-bate analieze van eine zjob? **Stan Linssen** kan ôs dao ei good zicht op gèeve, dachte wêe. En inderdaad: Stan wètj good waat oët is!

**Stan Linssen:** “Dao is niks gein vreugdje miër te rape inne verzekeringesektor. Altiëd bereikbaar môtte zeen. En altiëd mer sjaai. Dao weurdj veul te veul sjaai gemaaktj allewiel. De kōnsumpsiejmaatsjappiej ten

top. Brèk mer aaf, zoë dinke de luj. Stan dèktj det waal. Ich gaon het euver eine angere boeg goëje: veurtaan dèk ich alles, behalve sjaai!”

Jao, triestig is het esse veul ore maaks en weinig arbeidsvreugde kins. Det môt bij **Mathy en Linda Kwaspén** toch anders zeen? Dao kumtj eederein binne en boëte mèt eine smajl, toch? Einmaal de vraag gestèldj, veul det toch ferm tege...

**Mathy Kwaspén:** “Jônges, ich kreun ônger de negatieviteit dèe miëne zjob mèt zich mèt bringtj. Allein mer slecht noëts det hiej boëte geit: de gezètte staon ter vol van, Daag Allemaal mèt det feejk

noëts en diej roddels. Wèek- en maondjblaajer boë desse gooj zin van kriëgs kampe mèt eine daalendje verkoup. Dink aane Pleejboj en zoë. Diej krieg ich neet miër verkoch ômdet hiël internet al vol mèt bloëte tette stuit. En de lèste groëte winst oppe Lotto is ouch al ein iëwigheid geleeje...”

Jaojao. Waat ein ôngerzeukske van niks al oplevertj. Wèe zeen ter mer mèt gestoptj ôm neet nog miër zaot in al diej ope wônjes te struije. Het is al erg genôg dus laot ôs ter verder mer euver zwiëge. Laot ôs mèt alle Kinderse wuillesse ôs zelfstandige mer ein hart ônger de reem stèeke door ze eederen daag eine vriendelikke goojendaag te zègge. Det kostj niks en is veul wèerd!

## WIST GÈE DET...

... **Jean Fiddelèers**

aafgeloupe zomer mèt de henj in het haor zaat. Het was de wermste zomer sins 2003 en de leguume ginge hum kepot inne grôndj. Dao kwaam niks van water miër oët ziëne kraan boëte. Hiël vanne kaart aaf beldje hèe **Rob Wirix**. Gelökkig haaj Rob al nao 2 minuute het probleem gevônje. De kraan in Jean ziëne kelder stông toëw!

... De stoet dit jaor ein anger roete volgtj. Nao de Meulewèg trèkke wèe neet miër richting Chiero, mer gaon wèe haoks ôm aan Pierre Verheyden, de Processiewèg op. Einmaal aan het verhuëgdj kruuspuntje zjust veur de Kloësterstraot, geit de stoet wiejer (tege het normaal verkiër in veur dees gelegenheidj) richting Basissjoël en De Bunker, boë de ôntbinjing plaats vindj. Ei kèertje van diej roete vindj gèe ouch in dees gezèt!

... Het karnavalsbal nao aafloop vanne stoet mèt De Bunker ouch en nôw lokaasiej heet!

... Wèe uch dao allemaal massaal verwachte veur ei spetterendj fiëst!

... Aod-Vorst **Tei Vandael** eine Kindere gedichtebunjel heet oët gebrach. Hèe rijmtj en dichtj wiej eine koekwaus dao-in! Beslistj de meujte wèerd ôm aan te sjaffe.



# RAMKRAAKE IN KINDER

## ZINDERE NOG NAO!

Groëte kônsternasiej in Kinder, aafgeloupe jaor! Eine knal, eine slaag en gerinkel van glaas. De ING kreeg te make mèt eine regelrechte bômaanslaag. Staags trop begos drek het geprakkezeer euver wèem, waat, boëveur. Zoë wees ei deil van ôs Kinderse bevolking **Steve Bambust** mèt de vinger. Steve zou ziën bankkaart zien vergèete en zou den zoë mer geldj zeen gaon aafhole?! Nateurlik dikke kwatsj! Haaj het get te make mèt de in geldjnoëd zittendje fômfaar?! Teurlik neet! Wèe es redaksiej hóbbe ôs neet gemingdj in het geroddel, mer ginge op ôs eige op ôngerzeuk oët. En dao veele al drek get puzzelstökskes oppe gooj plaats...

Wèe kreege al snel 2 luj oët de naober in ôs vizier: **Jaak Jacobs en Hendrik Bruckers**. Jaak wis zoëgezag van niks. Los-e-weg door de knal hêr gesloape. Meug vanne opeinvolging van poste. Maak det de kat wiës! Hendrik haaj nao eige zègge alles zeen gebeure, mer waas sjiëtsjoëw en dörfdje geen fotoos te trèkke van oët het raam. Ammehoela waat ei gezwets! Wèe wiste drek det det zaakske stônk en ginge deeper grave. En zoë kwame

langzaamaan hiël de Sjaaimakers in beeldj...

Gèe môtj weite det det eigelik ein redelik patriejotis klupke is. Hiël op Aod-Kinder gerichtj en viës op al waat van euver de Aod-Kinderse grenze kumtj. En, zoë liërtj ôs ein underkover operasiej van ôzze mol **Hendrik 'Veus' Neyens**, redelik zjeloës op al diej tietels waat Kinder zoëgezag kriëgtj diej vervolges wèere opgeëistj door anger dörpkjes oët de fusie. Zoë heet veurig jaor Këesing bot e-weg verklaortj det de tietel 'Vesvriendelikste Gemeindj van Vlaondere' eigelik aan hun toëw kumtj. Hetzelfdje veur 'Aspergemeindj van Vlaondere'. Dao stechele diej anger dörpkjes nog euver, mer ze zeen ter waal euver oët det "het zeker neet Aod-Kinder is". Oppe koup tów dook ter in ôs meejboks ein foto op diej niks aane verbeelding euver luëtj: ei deil Sjaaimakers (allemaol manskèrels) mèt T-sjurts aan boë-op d'n tekst 'PINT EN VRIENDE' stuit, en **Wout Hoeken** mèt ein intiemiederendj pekske aan en eine groëte hood mèt EINDBAAS op oppe kop!

Veur de Sjaaimakers heet het duidelik hoëg gezèete. Ze belègdje ein geheim vergadering veur eine breejnstorm. Dao kwaam **Roy Conen** mèt ei gedach aaf. "Kinder heet het meiste aantal bankkantoëre en geldjottomate, lekker puh! Dao



môtte wèe toch get mèt kinne doen?" De rest vanne Sjaaimakers hunne euro veel, en het spel zaat oppe wage. En het vervolg kintj gèe: ein bômôntploffing aane ING! Volges betroëwbare info van ôzze mol heet **Bob Verlaek** veur het veurwrik gezörgdj, hóbbe Jaak en Hendrik de bôm gelag, reej **Raf Terwingen** mèt de vluchtotto en hóbbe **Nancy, Marlies en Jolien** veur de boterhemkes gezörgdj.

Het waas nateurlik drek groët noets: eine ramkraak in Kinder. De Sjaaimakers ginge drek low profaajl en druimdje al hel-op van ei vervolg. Eine noëwe datum waas snel gepriktj. Ôngertösse koos KBC veur ein riestaaing van hunne loek. Ôm de zoëgezagde ramkrakers te doen geluive det de KBC al waas opgeblaoze en verenneweerdj vervinge ze hunne glaze gevel door spaanplaat. Ei lumineus gedach!

De röst keerdje trök, mer det waas nateurlik allemaol taktiek vanne Sjaaimakers. De twiëdje ôntplöffing kwaam ter op ei momentj det neemes het haaj verwachtj: snachs nao de Prinsezitting bij Bpost! Diej piepo's dachte nateurlik det det kwa taajming iedejaal zou zeen veur aod-prinses **Kim**. Den zou ze zeker eine daag ekstra verlof kriëge op maandig es eeder bank op ziën Amerikaans in eine lockdown zou gaon. Jaomer genôg veur Kim kwaam het zoë wiëd neet. Sins ei paar jaor zeen wèe hiej in Belsj







get miër gewuën en geit het lèeve gewuën ziëne gank es get op weurdj geblaoze. Veur 2 Rabbedabbers echter, sloog d'n aanslaag oppe Bpost in wiej ein bôm.

Het toeval wiltj det **Raf Nijs en Bart Neel** nao het opruëme vanne zitting op ei slech momentj oppe slechte plaats wore. Ze reeje net vurbiej de post toen Verlaek het

veur aane lóntj staak en Terwingen d'n otto in rallentie haaj bolle op het fitsepaad. Raf en Bart huërdje de knal, zage eine ónherkinbare Bob nao d'n otto renne en kregge het Spaans benauwdj. "Rieje, Bart, det is eine ramkraak," zou Raf gerope hóbbe. Bart gaaf plankgaas, terwiël Raf mèt ziëne kop kômpliët ónger het desjbord kroop en in eine gank in ziën bôks sjeet! Det môt, Raf kinnendje, nogal gestónke hóbbe! Ei wónjer det Bart, bevange van de stank, neet recht tege de gevel van **Mathy en Linda Kwaspén** is gereeje. Num het geröst ei gelök bij ein óngelök...

Sins d'n aanslaag oppe post hóbbe wèe niks miër gehuërdj of opgevange. Zou het te werm zeen gewore ónger de puëj vanne betrokke? Of is de goesting euver? Wèe haoje de vinger aane pols en bringe uch het noëts zoë snel es wèe get weite.

## GEWUËN MÔPPE

**Thieu Moubax** en **Jef Kwaspén** zitte aane Goërt op ei benkske. Ze rizenere euver de gooje aojen tiëd en euver de lèeftiëd dèe ze al bereiktj hóbbe.

Jef: "Ich veul niks angers es piën en óngemaak. Ich weit verdorie waat aojer wèere is. Wiej veuls dich dich eigelik, Thieu?"

Thieu: "Ich veul mich wiej eine pasgebore beebie!"

Jef: "Mer alé dich, wiej kumtj zoë get?"

Thieu: "Ich hób gein haor, gein tenj en ich dink det ich zjust in miën bôks hób gesjetel!"

**Jean Meurs** kumtj te sterve en stuit in d'n hemel bij Sint Pieter aane poort.

Hèe vertèldj det hèn alzelèeve eine gooje mins is gewèest, getrouwdj mèt ziën iëste leefste **Marissa**, hel gewirkjt, mèt geholpe in het hoëshaoje...

Opins veultj Jean get kietele op ziëne rök. Hèn kiëkt òm en zuët 2 hiël klein vleugelkes gruje.

Daodoor aangemoedigdj geit 'r wiejer: "Ich hób altiëd gedaon waat Marissa mich vroeg, drek van het wirk heivis, neet op kaffee..."

Hèn zaag de vleugelkes gruje en gruje.

"Ich hób noëjts nao anger vroluj gekeke, altiëd al miën geldj aafgegèeve aan Marissa..." En diej vleugels wore mer groëter en groëter. Jean vreugt aan Sint Pieter: "Bèn ich nôw ein ingelke?" Zeet Sint Pieter: "Nèe, ei kuëke!"



## GEWUËN MÔPPE

**Tony Vanwijck** reej te hel mèt ziëne Porsj. Hèe kriëgtj **Bart Douma**, de pellis, achter zich aan. Tony reej wiej langs wiej heller. Oeteindelik zètj Bart hum aane kantj.

**Bart:** “Awaal, Tony, ich höb dich ei stopteike gegèeve? Neet gezeen? De reejs wiej langs wiej heller!”

**Tony:** “Ich haaj sjrik. **Marijke** is ter mich ei jaor geleeje met eine genderm vandoor gegaon. Ich dach: dèe wiltj ze mich trok bringe!”

Dao staon eine houp pelisse inne Kirkhofstraot. **Prins Bart** en **Sven Beelen** staon ter bije te kiëke. “**Kwaffeus Ellen** is opgekaptj! Ze bleek te hanjele in drugs en ze rundje ouch nog ins ein eskortservis...”, zee de Prins. Sven kiëktj bedinkelik: “Kinse naogaon wiej slecht desse de minse eigelik kins. Ich waas al jaore eine vaste klantj en ich höb noëjts geweite det ze kwaffeus waas...”

**Katrien Theijbers** kumptj bjun mèt 2 groëte ummers kôwmèst van bije Wout Hoeken, veur bjeur in d’n hoof. “Boëveur deentj det?” vreugtj **Jeugdprinses Ilani**. “Veur de èerdbière,” zee Katrien.

Ilani staartj heur aan en zee: “Ich höb ze toch leever mèt slaagroum...”

**Erwin Ressen** tege **Kristel** bjun: “Sjat, ich ben zoë sjerp, ich môt mer eine damesfits zeen en ich wèer al wildj!”

## DRIEJ KEUNINGE WILLE VERANGERING!



Het waas ei paar daag nao noëjaor det ‘r eine opstandj begos in ôs opwindendj röstig dörpke. Ei verhaol mèt allein mer verleezers. Ein triestige zaak. Wèe zullen beginne bije het begin.

In Kinder höbbe wèe geine sinjoreprins. Noëjts gehadj en ouch gein planne ôm ter eine te installere. Dao is eine bepaaldje helle kern dèe dao zwaor op tege is en dèe al jaore de oëre van ôzze kop zèegtj ôm dao veranging in te bringe. Mer wèe, Rabbedabbers, gaave geine mieliemèeter tów. De lèste kiër, rëndj 11 november, sjoot het in hun verkiërdje kèelgaat en leet **Twan Smeets**, de geistelikke leider van diej hoeliegans, zich ôntvalle: “Wèe gaon ter korte mètte mèt maake! Stèektj ugge sinjoreprins mer boë de zôn neet sjientj! Wèe zulle ins veur echte veranging zörge. Get veul hippers! Kiëktj mer oët!”

Alle Rabbedabbers keeke ins nao d’n eine d’n angere en dachte det



## EI GEHEIM RESEPT VAN POOL FRIT!

Ôzze eige **Pool Frit** zal eeder jaor ein van ziën geheim resepte priës gèeve diej hèe gebuëkdje inne frituur vreuger, in Elkerlyck en inne Heerlijkheyd.

Efkes good oplètte, want in deze Rabbedabber lègtj Pool uch van naoldj tot draod (of môtte wèe zègge van pan tot ketel?) oët wiej gèe kniën op groëtmoojers wiës klaor maaktj. Det is dus ein hiël aod reseptje, want Pool zelf is al lank bômpa. Tèl zelf mer ins veur de gekkigheid oët. Dit reseptje is missijng al van de 19dje iëuw!

### Waat môtj gèe hole inne winkel?

- 4 kniënsboute of eine ganse kniën in stökke gesneeje
- Boter en olie
- Pèeper, zaot en nootmuskaat
- Tijm en laurier
- Broëne en witte sôkker
- Temattee puree
- Bloom
- Zilveruënje (zoor)
- Sjampienjôngs
- Dônkel beer (Gummaris dônkel of eine trappist)
- Reziëne
- Erte en moëre
- Spek
- Yacon

Twan gek waas gewoore. Zich zoë laote gaon veur zoë get stòm's? Het zal waal aafkeule. Mer det deej het dus neet...

Ei paar wèeke later waas ter aardig get oët in Kinder. Dao trokke 3 keuninge door het dörp, roopendj en zingendj! "Driej keuninge, driej keuninge, veul bèeter es eine Prins! Eine aoje maag 't ins wèere, ein heudje mèt get vèere! De vrouw diej is akkoord en ôs pensjoenspaarkas aangeboordj!"

Det waas dus Twan en ziëne aanhang **Wynand Vankerkom en Jan Oudenaarden**. 's Mörge vreug al begoste ze inne mès in Biësel mèt hunne propaganda oët te kraome. Toen nog hiël suptiel, mèt allein mer ei klekske boë-op 'Maak Kinder weer Gruëts' stông. Einmaal de mès gedaon waas en ze van pestoër hun zegeninge en eine flinke borrel haaje gekrege, trokke ze wiej ein fômfaar van honger en doost rôndj in Kinder-dörp, zingendj en tempiestendj.



Euveral trokke ze de frigo ope en sjodde ze zich hum good in. Ein regelrechte sjanj waas het. Later oppe middig (ze haaje ôngertösse bij De Limburger get zwart broëd mèt spek bij-ein gebèedeldj) ging het nog get wiejer. Twan vônj achter het buffèt van Chez Vie ei stökske kriët en begos dao zonger boe of ba ein wiskundige formuul mèt op de moore te sjrieve:  $20 - K > P + V = 0 - 19$ . Det stuit bliëkbaar veur: in 2019 is eine keuning groëter es eine prins en de vorst is ein dikke nul. En zoë ginge dees 3 keuninge wiejer sjaai makendj de nach in...

Sangerdaags steurdje wèe ôs redaksiej op paad ôm verhaol te gaon hole bij Twan. Dèe wis van al diej pinte en borrels neet miër 100 persent waat 'r allemaol haaj oëtgestoke mèt Wynand en Jan. Mèt het sjaamroëd oppe wange trok hèe de deur achter zich tów. Wèe huërdje **Anita** nog ferm op hum sjandale. De zouws dich veur minder sjame, es partner.

In Kinder gaon wèe het gewuën haoje wiej het is. Eine Prins en niks anders! Dao zulle hiël get miër keuninge veur nuëdig zeen ôm dao verangering in te bringe!

### Waat mô'tj gèe doon veur eine lekkere kniën a la groëtmoojer van Pool Frit oppe taofel te kriëge?

- De stökke kniën good kruëje mèt pèeper en zaot, in bloom dreije en sjoën aanbakke aan alle kantje in ½ boter en ½ olie. De stökke moge den oët de braodpan wèere gepaktj en in ein braodseele of platte ketel wèere gelag.
- Ôntvèt de braodpan boë desse zjust de kniën in hõbs aangebakke, en doot ter den 2 ètelpels tematpuree in. Good bliëve reure en blusse mèt dônkel beer. Good bliëve reure en bevochtige mèt boejông (water mèt kippeblökskes). Tijm en laurier bij doon en de hiële mikmak opkoke.
- Einmaal opgekooktj maag alles euver de kniën wèere gote tot

alles sjoën ônger stuit. (De kniën waaltevastaon, de mõs neet mèt de braodseele de kelder in gaon.)


- Ôngertösse make wèe eine broëne sjoëp van witte en broëne sôkker. Daoveur mô'tj gèe 2 ètelpels witte en 2 ètelpels broëne sôkker in 200 cc water doon, en alles laote inkoke tot het broën weurdj. Blus het den mèt ei bitje water en ein sjout dônkel beer. Bliëf efkes good reure en doot 'r de zilveruënjkes bij. Kip het daonao mer bij de kniën.
- Laot de braodseele mèt de kniën 20 a 30 menuute in eine over of in eine ketel op het veur zaachtjes suddere.
- Den beginne wèe mèt de greuntje!
  - Stoof erte en moëre aan in boter, mèt zaot, pèeper, nootmuskaat en ei bitje sôkker.

- Sniej sjampienjõngs en stoof ouch diej aan.
- Spek in klein stökskes snije en aanstove.
- Ouch de yacon klein snije, en den mèt zaot en pèeper in ei bitje boter en water aanstove (ôngeviër 8 menuute).
- Reziëne weike in water.

Es de kniën klaor is, kintj gèe hum van het veur of oët de ove pakke. De greuntje moge ter bij gedaon, of apaart wèere geserveerdj. Es gèe ze ter bij dootj: good ônger reure en aafsmake.

## Smakelik!!!

# IËWIGE SJANJ: JO BROUNS HEET EINE EIGE KLIKFARM!



'Populêrste bôrgemeister van Limburg', zoë stông het in 't lank en 't breid inne gezèt, begin oktoëber. Haaj nateurlik zoë mer gekintj, waas het neet det Jo eine CD&V bôrgemeister is. Diej partij is neet zoë good mèt alles waat de sosjale meedieja of internèt betrefjt. Op ôs redaksiej ginge drek de zweijleechte aaf. Dit kôs waal ins opgezatj spel zeen! En, inderdaad: ôngerzeuk bewees det het zaakske stônk. Wêe koste de handj lègge op fotomaterjaal boë-op klaor en duidelik bliëktj det Jo eine klikfarm runtj!

Ôs redaksiej kreeg eigelik locht van dit verhaol toen wêe merkdje det dèe zoëgezagde vônkelnôwwe transformator mèt veul bekiëks door Kèsing en Kinder op gereej woor, mer in plaats van det lèste stökske Raomdiëk te pakke, ging het haoks ôm richting Basdônk!

Van det bekiëks waas toen al lank geine kal miër. Det dink

ging zoë tergendj traag det eederein al kaök gekeke waas en trök heivis ging. Allemaol taktiek, of waat dachtj gèe!

Ônger zwaore drök vanne Kinderse polletiek heet fruitboor **A.R.**, dèe gèer annoniem wiltj bliëve ôm begriëpelikke reejene, ein stök loëds môtte inrichte mèt kômptoeters en ziën fruitplökkers nao heur ore op het veldj en inne sèeres op **Jo Brouns** môtte laote stömme. Det

zoë eine kraom vollebak stroom van doen heet, is nogal wiedes. Dao hóbse eine aardige transformator veur nuëdig! Mèt eine droon (ter besjikkig gestèldj door **VDS Elektroniks**, boëveur dank) hóbbe wêe de lokasiej kinne achterhole. Ônger ein groëte bash zwarte plastiek zitj 'r verborge. Jo dinktj zeker det det neet opviltj, zwarte plastiek op ein èrbiëreveldj, mer dit zou toch waal ein hiël groëte èrbiër zeen!? Mèt ein infraroëdlens hóbbe wêe het stök loëds kinne achterhole boë de klikfarm is ingerichtj. Hiël in eine godvergèete hook van ein sèer. De môs al aardig door get blauwbesse op knauwele iër desse dao bie j oët kumps!

Ei gemaniepileer vanne boveste plank dus. Ein iëwige sjanj! Het ergste van hiël het verhaol is echter het minselikke aspektj, waat al snel oët het oug weurdj verlore. A.R. ziën vrouw **Chr.** is ter hiël aan ôngerdoor gegaon. Ze geit al wêeke nao de psiecholoog en heet last van rejaal stömmingswisseling. Laot ôs hope det de verantwoordelikke van dees fraude en dit minselik drama zich ins good bezintj!



# ÔNBELASTJ BIEJVERDEENE GOOD VANNE GRÔNDJ IN KINDER!

Sins ei good jaor moogse es wirkendje Belsj get ekstra sente bije verdeene zônger desse dao belastinge op môs betale. En het môt gezag det 'r ouch in Kinder get wuillesse op diej ker zeen gesprônge. De bewègreejene zeen waal op zien minst gezag oëteinloupndj!

## Peter Hoedemakers en Jan

**Brouns** hōbbe zich bije ein gepaktj ôm eine riejendje pieza-ove inein te stēeke. Jan wiltj stiekem al jaore trōk nao Kinder kōme. Hēe is Kèsing zoë meug es kaoj pap. Eederein wiestj hum dao achternao: "Det erm sjaop van Kinder..." Wēe kinne det es Rabbedabbers good begriēpe. **Wielke Peeters** vanne Raod van Èllef vanne Ertesjieters weurdj ouch al gepestj sins hēe



van Biēsel nao Kèsing is gegange. Wielke môt veur diej Ertesjieters altiēd de pot bije haoje, den drank gaon hole, de wage stofzuige nao eeder stoet, enzoëvoort. Ze haoje hum dao waal zeut mèt te zēgge: "Wiel, esse good diēn bèst bliefs doon, geise stijge inne hierarchie. Det beloove wēe dich!" Oppe aoj saajt vanne Kèsinger karnaval stōng Wiel bije de opsōmming vanne raodslede hiēlemaol ôngeraan. Mèt het lansere vanne noēw saajt meindj

'r det 'r get gestege is, mer stiekem lache ze hum wiejer oēt achter ziēne rōk door eine foto te gebrueke boē ter mèt de môndj wagewiēd ope stuit. Van dēe naam 'Gaapplepel' raaktj Wiel noējts miēr aaf...

Het is dus good te vatte det Jan trōk nao Kinder wiltj kōme, mer de fianansieje staon inne wēeg. Grōndj en hōēze zeen in Kinder nateurlik veul deurder den inne anger kirkdōrpe. Peter wiltj ziēne kammeraod waal get steune mer sins hēe zelf ein nôw hōēs heet gekoch en de voetbalsjoon aane haok hange en dus ouch de zwarte premies weg zeen gevalle, heet 'r het zelf neet miēr al te breid. Bije klusse dus! Pé heet Jan waal de wach aan gezat: "Dich geis mèt wauve, anders weurdj het niks!"

Pieza JaPé waas snel gebore.

In naovolving van het mobiele wiēn-aan-hoēs-projektj van **Koen Quix en Brecht Vanhoef** (lēs Rabbedabber 2017) hōbbe ze zich ouch eine okkaziej Vespa diejwieler gekoch en doa eine ove op gezat. Al verdinke wēe dees japers ter van det het gewuēn dezelfdje ker betreftj. Vanne Pinot Basdōnk huērse namelik neet miēr veul, nao ei paar mislōkdje brouwsels... Jan en Peter gaon dus sins kort hōēs-aan-hoēs pieza bakke. Wēe dinke det ei suksesverhaol inne maak is en winse ze langs deze wēeg veul sukses!

Ouch **Marc Voortmans** heet geldj geroke. Marc en **Lut** haaje zich get misrēekendj bije de verbōwinge vanne koēj en op het lēst kwaam de



boojem vanne kist in zicht. Paniek inne tent! Marc en Lut kwame nao krisisberaad al snel tot de kōnklusiej det Marc eigelik allein nog mer bekwaom is ôm betōng te make. Nao 35 jaor inne sektor stuisse op en geise sloope mèt sement, kezel en mortel en dich ômsjoēle op dēe lēeftiēd: det is het neet. Gelōkkig haaj Marc zich snel niēr gelag bije det feit en kwaam hēe mèt ei perfekt gedach aafzētte: Voortmans' Mini Betōngsentral. Ônger het motto 'veur ei betōnge dēkske klein en fijn riej ich snel achterôm, wirktj uch zelf mer de rōk neet krôm!'

Fier es eine geeter stuit Marc ôs redaksiej te woord: "Mèt get gooje wil, kumse dēk al wiēd. Ich wil het ouch echt neet te groēt zeen, den zitse es nôwwe zelfstandige speuler in deze sektor al drek mèt eine houp euversjoot. En gēe wētj: euversjoot kostj geldj en eine stok kin ich neet aanlēgge. Det weurdj dich snel keihēl en hool de kraom dich den mer ins oēt de mikser. Ich bēn den ouch gēspisjalizeerdj in funderinge van hōndsکوēje en dēkskes veur pakweg ein zitbank op te zētte. Veur groēter projekte staon ich waal degelik ope, mer den môt het in versjillendje fazes en euver miērdere wiekendje gespreidj wēere. Ei licht kleurversjil is den meugelik. Met det heet eigelik ouch zien sjarmes."

Gēe huērtj het: ouch Marc heet zich al good oppe kaart gezat. Zoēwaal waat produktj es verkoupestechneike betreftj. Veul sukses mèt de zaak, Marc!

# DEN ALLERLÈSTE KIËR MALPERTUUS!

Ein iekonis pandj, eine geweldige kaffee. Det waas Malpertuus in Kinder. Mer waat ins waas, is neet miër. Tiejje van kôme en tieje van gaon, gèe kintj det waal. Mer es wèe get good kinne in Kinder, is het fiëste. De Landelikke Gilde haaj det good begrepe. De boel nog ins flink begaaje veur de buldozers de kraom plat zouwe dôwwe!

Dao kwaam hiël get volk oppe bein veur ei besjeije fiëstje in ein ruuwie. En det fiëstje woor al snel ei fiëst. Tot inne late eurkes! Wèe steurdje ôzze Prins, get mèn vanne Raod van Èllef, de Vorst en ôs redaksiej ôm get foto's te trèkke en get te rizennere mèt de luj. En het maag gezag: dao waas get oët! Herinneringe aan vreuger kwame trök, dao woor gelache en gebeuktj. Ôs redaksiej maakdje veur uch dees fotokollaasj.



Weer ein vechtpartiej! Nico Vandevorst houwdj Ivo Theys tege zjèn oug.



In eeder vereiniging hóbse wirkpèerd en luksepèerd. Dean haaj gein zin ôm garcon te speule in en brach oët protest mer 1 pint per kiër rón dj.



Vreuger ging het wiej niks: het tradiesjonele 'lusterhangé'. Vandaag d'n daag luptj het al drek mis. Eederein is den ouch gemiddeldj 15 kilo zwaarder es indertiéd...



Ouch Alex van Sportkaffee De Sjans waas vanne partij en probeertj nog snel zjène mobiele tapwage te verheure. Willem Vermandere waas spesjal guest en zông later oppe aovendj nog get leedjes.



Wiej later, wiej vèttiger. Toen Debke veur Jarne Meurs eine meziekrekst mós vas haoje zaag Danny Kunnen ein sjoèn kans ôm nog ins vanne gròndj te gaon. Deb zaag det neet zitte, staak de tóng oët en probeerdje Danny van zich aaf te sjódde.





*Gehiël volges de leste pollerieke trends, vreugtj Brouns aan Boets of dee neet es ónaafbankelikke bjum oppe liest wou staon. Boets weigerdje.*



*Veur de ónvergètelikke ambiejaos en gezelligheid zörgdje veural de kèerels ónger de 40 jaor...*



*Neet alles ging good. Dao zeen al tied sjarels bie diej dinke det ze inne pòmmbak moge pisse!*



*Jean Donnè haaj de bókseugel aan. Erg det 'r toch ouch al tied volk kumpjt óm ruzie te maken en te vechte...*



*Hiej môt miër gevèete wèere, aldus Bòndj en Ivo Theys.*



*Jo Brouns veel mèt zièn kleijer get oèt de toèn. Hèe dach det oppe oëtnuëjing 'dich aandoon wiej vreuger' stóng, in plaats van 'dich amezere wiej vreuger'.*



*Sjik gedach, diej kilte, mer het zoörgdje waal veur get piënlikke vaststèllinge. Zoëwaal bie Tjeu es bie Bèr heet de zwaortekrach het gewónne van het liëf...*



*Annie vanne vreugere kaffee 't Karrewiel veultj zich oppe slaag weer toès. "Het is hiej zoë gezellig rómmeilig. 't Stuit hiej vol mèt kraom. Zoë eine aoje rómmeil haaje wèe indertiéd in ózze kaffee aane plafõng hange!"*



**DIALEKTOËTZENDING**  
**RADIO MONZA**  
SJEËLE ZEIVER EN AMBIEJAOS OPPE  
LOËSTERTOER VAN 16 TOT 23 ORE

**GROËTE STOET &**  
**ACHTERAAF AMBIEJAOS**  
**INNE BUNKER**

**VERKLËDJ BAL**  
**CAFÉ DE LIMBURGER**  
- 20.11 ORE - INKÔM GRATIS

**PRINSEBAL**  
**PRINS BART III**  
DE SCHANS - 20.11 ORE  
INKÔM GRATIS

**MIËRT**  
1e wêck  
zôn op 7:11

Prinsmaandj

2019 . 370  
zôn ônger 18:11

**1**

MONZADAAG

**VRIËDIG**

**MIËRT**  
1e wêck  
zôn op 7:11

Prinsmaandj

2019 . 370  
zôn ônger 18:11

**3**

STOETDAAG

**ZÔNDIG**

**MIËRT**  
1e wêck  
zôn op 7:11

Prinsmaandj

2019 . 370  
zôn ônger 18:11

**4**

BAG(EL)DAAG

**MAONDIG**

**MIËRT**  
2e wêck  
zôn op 8:11

Prinsmaandj

2019 . 370  
zôn ônger 19:11

**9**

PRINSEBALDAAG

**ZAOTERDIG**

